

欽定元史

卷之二十五

欽定元史

卷一百一十五

元史卷十七

明翰林學士亞中大夫知制誥兼修國史宋濂等修

本紀第十七

世祖十四

二十九年春正月甲午朔以日食免朝賀日食時左右有珥上有抱氣丙申雲南行中書省言羅甸歸附後改普定府隸雲南省三十餘年今勅羅甸宣慰安撫司隸湖南省不便乞罷之仍以其地隸雲南省制曰可戊戌清州饑就陵州發粟四萬七千八百石賑之己亥命太史令郭守敬兼領都水監事仍置都水監少監丞經歷知事凡八員八作司官舊制六員今分爲左右二司增官二員庚子江西行省左丞高興言江西福建汀漳諸處連年盜起百姓入山以避乞降旨招諭復業福建鹽課既設運司又設四鹽使司今若設提舉司專領鹽課其酒稅課悉歸有司爲便福建銀鐵又各立提舉司亦爲冗濫請罷去詔皆從之禁商賈私以金銀航海壬寅以武平地震全免去年稅四千五百三十六錠今年量輸之止徵二千五百六十九錠癸卯命玉典赤阿里置司崑州以便糧餉而以輕軍邏思明州以漢天師張宗演男與棣嗣其教陞利用監正三品甲辰詔江南州縣學田其歲入聽其自掌春秋釋奠外以廩師生及士之無告者

貢士莊田則令覈數入官乙巳賜諸王失都兒金千兩丙午河南福建行中書省臣請詔用漢語有旨以蒙古語諭河南漢語諭福建罷河南宣慰司以汴梁襄陽河南南陽歸德皆隸河南行省復割湖廣省之德安漢陽信陽隸荆湖北道斬黃隸淮西道并淮東道三宣慰司咸隸河南省其荆湖北道宣慰司舊領辰沅澧靖歸常德直隸湖廣省從葛蠻軍民安撫使宋子賢請詔諭未附平伐大甕眼紫江皮陵潭溪九堡等處諸洞貓蠻戊申太陰犯歲及軒轅左角己酉興州之興安宜興兩縣饑賑米五千石罷南雄韶州惠州三路錄事司壬子桓州至赤城站戶告饑給鈔計口賑之癸丑罷四賓庫復會同館初置織造段足提舉司五八番都元帥劉德祿言新附洞蠻十五寨請置官府以統之詔設陳蒙爛土軍民安撫司江西行省伯顏阿老瓦丁言蒙山歲課銀二萬五千兩初制鍊銀一兩免役夫田租五斗今民力日困每兩擬免一石帝曰重困吾民民何以生從之內辰播州洞蠻因籍戶懷疑竄匿降詔招集之以行播州軍民安撫使楊漢英爲紹慶珍州南平等處沿邊宣慰司行播州軍民宣撫使播州等處管軍萬戶仍佩虎符壬戌召嗣漢天師張與棣赴闕二月甲子朔金竹酋長騷驢貢馬氈各二十有七從其請減所部貢馬降詔招諭之賜新附黑蠻衣襖遣回命進所產朱砂雄黃之精善者無則止遣使代祀嶽瀆后土四海乙丑給輝州龍山里州和中等縣饑民糧一月丁卯敗于近郊命宿衛受月廩及蒙古軍以類食受糧者宣徽院

仍領之己巳太陰犯畢發通州河西務粟賑東安固安薊州寶坻縣饑民申禁鞭背庚午韓羅思招附桑州生猶羅甸國古州等峒酋長三十一所部民十二萬九千三百二十六戶詣闕貢獻壬申敕遣使分行諸路釋死罪以下輕囚澤州獻嘉禾乙亥立總管高麗女直漢軍萬戶府頒銀印總軍六千人以泉府太卿亦黑迷失鄧州舊軍萬戶史彌福建行省右丞高興並爲福建行中書省平章政事將兵征爪哇用海船大小五百艘軍士二萬人戊寅立征行左右軍都元帥府都元帥四副都元帥二上萬戶府達魯花赤四萬戶皆四副萬戶八鎮撫四各佩虎符詔加高麗王王瞻太保仍錫功臣之號詔從諸王阿禿作亂者朶羅帶以付闊里吉思脫迭出以付阿里抄兒赤以付月的迷失合麥以付亦黑迷失使從軍自效又詔諸王從合丹作亂者納答兒之鎮南王所聶怯來之合刺合孫答刺罕所阿禿之雲南王所朶列禿之阿里所八里帶之月的迷失所幹里羅忽里帶之東海發義倉官倉糧賑德州齊河清平泰安州饑民庚辰月兒魯等言納速刺丁滅里忻都王巨濟黨比桑哥恣爲不法楮幣銓選鹽課酒稅無不更張變亂之術命江南理算者皆嚴急輸期民至嫁妻賣女禍及親鄰維楊錢塘受害最慘無故而隕其生五百餘人其初士民猶疑事出國家今乃知天子仁愛元元而使民至此極者實桑哥及其凶黨之爲莫不願食其肉臣等議此三人旣已伏辜乞依條論坐以謝天下從之牙亦迷失招無籍民千四百三十六戶請隸東宮

詔命之耕田辛巳從樞密院臣暗伯等請就襄陽給曲先塔林合刺魯六百三十七戶田器種粟俾耕而食丁亥以汪惟和爲鞏昌等二十四處便宜都總帥兼鞏昌府尹仍佩虎符御史臺月兒魯崔瑛等言馮子振劉道元指陳桑哥同列罪惡詔令省臺臣及董文用留夢炎等議其一言翰林諸臣撰桑哥輔政碑者廉訪使閻復近已免官餘請聖裁帝曰死者勿論其存者罰不可恕也乞台不花等使緬國詔令遙授左丞廷議以尙書行使事其副以郎中處之制曰可戊子禁杭州放鷹己丑歲星犯軒轅大星庚寅宣政院臣言授諸路釋教都總統鞏真朮納思爲太中大夫土蕃等處宣慰使都元帥敕崎零拔都兒三百四十七戶佃益都閑田給牛種農具官爲屋居之壬辰山東廉訪司申棣州境內春旱且霜夏復霖澇饑民啖藜藿木葉乞賑卹敕依東平例發附近官廩計口以給三月甲午詔道脫忽思儂獨赤昔烈門至合敦奴孫界與駙馬闊里吉思議行屯田己亥樞密院臣言出征女直納里哥議於合思罕三千新附軍內選撥千人詔先調五百人行中書省具舟給糧仍設征東招討司壬寅御史大夫月兒魯等奏比監察御史商琥舉昔任詞垣風憲時望所屬而在外者如胡祇遒姚燧王惲雷鷹陳天祥楊恭懿高道程文海陳儼趙居信十人宜召寘翰林備顧問帝曰朕未深知俟召至以聞丙午中書省臣言京畿薦饑宜免今歲田租上都隆興平灤河間保定五路供億視他路爲甚宜免今歲公賦漢地河泊隸宣徽院除入太官外宜

弛其禁便民取食並從之丁未納速刺丁滅里以盜取官民鈔一十三萬餘錠忻都以徵理逋負迫殺五百二十人皆伏誅王巨濟雖無賊帝以與忻都同惡并誅之中書省與御史臺共定賊罪十三等枉法者五不枉法者八罪入死者以聞制曰可戊申以威寧昌等州民饑給鈔二千錠賑之己酉以大司農同知宣徽院事兼領尙饈監事鐵哥翰林學士承旨通政院使兼知尙乘寺事刺真並爲中書平章政事兼領舊職中書省臣言右丞何榮祖以疾平章政事麥朮丁以久居其任乞令免署惟食其祿與議中書省事從之以阿里爲中書右丞梁暗都刺爲叅知政事中書省臣言亦奚不薛及八番羅甸旣各設宣慰司又復立都元帥府其地甚狹而官府多宜合二司帥府爲一詔從之且命奚不薛與思播州同隸湖廣省羅甸還隸雲南以八番羅甸宣慰使韓羅思等並爲八番順元等處宣慰使都元帥佩虎符以安南國王陳益稷遙授湖廣等處行中書省平章政事佩虎符居鄂州庚戌車駕幸上都賜速哥韓羅思賽因不花蠻夷之長五十六人金紋綾絹各七十九疋及弓矢鞍轡王子樞密院臣奏延安鳳翔京兆三路籍軍三千人桑哥皆罷爲民今復其軍籍屯田六盤從之敕都水監分視黃河堤堰罷河渡司庚申免寶慶路邵陽縣田租萬三千九百七十三斛壬戌給還楊璉真加土田人口之隸僧坊者初璉真加重賂桑哥擅發宋諸陵取其寶玉凡發冢一百有一所戕人命四攘盜詐掠諸賊爲鈔十一萬六千二百錠田二萬三千畝

金銀珠玉寶器稱是省臺諸臣乞正典刑以示天下帝猶貸之死而綸還其人口土田隆興府路饑給鈔二千錠復發粟以賑之夏四月丙子太陰犯氐己卯復典瑞監三品弛甘肅酒禁權其酤辛巳弛太原酒禁仍權酤辛卯設雲南諸路學校其教官以蜀士充五月甲午遼陽水達達女直饑詔忽都不花趣海運給之丙午敕雲南邊徼入朝非初附者不聽乘傳所進馬不給芻豆丁未中書省臣言妄人馮子振嘗爲詩譽桑哥且涉大言及桑哥敗卽告詞臣撰碑引諭失當國史院編修官陳孚發其姦狀乞免所坐遣還家帝曰詞臣何罪使以譽桑哥爲罪則在廷諸臣誰不譽之朕亦嘗譽之矣詔以楊居寬郭佑死非其罪給還其家資改思州安撫司爲軍民宣撫司隸湖廣省詔諭其民因閹戶驚逃者各使安業以陝西鹽運司酒稅等課已入州縣罷諸子鹽司併罷東平路河道提舉司事入都水監己未龍興路南昌新建進賢三縣水免田租四千四百六十八石是月眞定之中山新樂平山獲鹿元氏靈壽河間之滄州無棣景之阜城東光益都之濰州元海縣有蟲食桑葉盡無蠶六月甲子平江湖州常州鎮江嘉興松江紹興等路水免至元二十八年田租十八萬四千九百二十八石戊辰詔聽僧食鹽不輸課己巳日本來互市風壞三舟惟一舟達慶元路壬申江西省臣言肇慶德慶二路封連二州宋時隸廣東今隸廣西不便請復隸廣東從之鐵旗城後察昔折一烈率其族類部曲三千餘戶來附甲戌設司籍庫秩從五品隸太府監儲

物之籍入者丙子太寧路惠州連年旱澇加以役繁民饑死者五百人詔給鈔二千錠及糧一月賑之仍遣使責遼陽省臣阿散壬午敕以海南新附四州洞寨五百一十九民二萬餘戶置會同定安二縣隸瓊州免其田租二年癸未以征爪哇暫禁兩浙廣東福建商賈航海者俟舟師已發後從其便丁亥湖州平江嘉興鎮江揚州寧國太平七路大水免田租百二十五萬七千八百八十三石己丑太白犯歲星鐵木塔兒薛闊禿捏古帶闊闕所部民饑詔給米四千石付鐵木塔兒薛闊禿一千石付捏古帶闊闕俾以賑之閏六月辛卯朔陞上都兵馬司四品如大都丁酉遼陽瀋州廣寧開元等路雹害稼免田租九萬七千九百八十八石岳州華容縣水免田租四萬九百六十二石東昌路蝗壬寅以東安海寧改隸淮安路詔大都事繁課稅改隸轉運司通州造船卑罷提舉司罷福建歲造象齒鑿帶戊申熒惑犯狗國庚戌回回人忽不木思售大珠帝以無用却之辛亥河西務水給米賑饑民江北河南省既立詔江北諸城悉隸其省詔漢陽隸湖廣省左江總管黃堅言其管內黃勝許聚眾二萬據忠州乞調軍萬人土兵三千人命劉國傑討之臣願調軍民萬人以從詔許之太平寧國平江饒常湖六路民艱食發粟賑之高麗饑其王遣使來請粟詔賜米十萬石中書省臣言今歲江南海運糧至京師者一百五萬石至遼陽者十三萬石比往歲無耗折不足者甲寅右江岑從毅降從毅老疾詔以其子斗榮襲佩虎符爲鎮安路軍民總管廣南

西路安撫副使賽甫丁等誹謗朝政沙不丁復資給之以風聞三十餘事妄告省官帝以有傷政體捕惡黨下吏如法乙卯濟南殷陽蝗是月詔諭廉訪司巡行勸課農桑禮部尙書張立道郎中歪頭使安南回以其使臣阮代乏何維岩至闕陳日燿拜表歲修歲貢秋七月庚申朔詔以史弼代也黑迷失高興將萬人征爪哇仍召三人者至闕遣使檢覈竄名鷹坊受糧者辛酉河北河南道廉訪司還治汴梁癸亥完大都城也里鬼里沙沙營簽僧道儒也里可溫答赤蠻爲軍詔令止隸軍籍甲子降詔申嚴牛馬踐稼之禁乙丑阿里願自修船同張存從征爪哇軍往招占城甘不察詔授阿里三珠虎符張存一珠虎符仍蠲阿里父布伯所負斡脫鈔三千錠丙寅罷徽州路錄事司免屯田租一萬二千八百一十一石辛未太陰犯牛壬申建社稷和義門內壇各方五丈高五尺白石爲主飾以五方色土壇南植松一株北墉瘞坎壘垣悉倣古制別爲齋廬門廡三十三楹戊寅黎兵百戶鄧志願謀叛伏誅庚辰敕雲南省擬所轄州縣官如福建二廣例省臺委官銓選以姓名聞隨給授宣敕八月己丑朔賽甫丁處死餘黨杖而徒之仍籍其家產壬辰勅禮樂戶仍與軍站民戶均輸賦丁酉辰星犯右執法己亥太白犯房辛丑靈夏府屯田成功陞其官脫兒赤壬寅括唐兀秃魯花所部闊家赤及河西逃人入蠻地者甲辰車駕至上都討浙東孟總把等賊敕諸軍之駐福建者聽平章政事闊里節度乙巳歲星犯右執法丙午用郭守敬言浚通州至大

都濟河十有四役軍匠二萬人又鑿大渠灌昌平諸水以廣濟畧屯田既蝗復水免今年田租九千二百
十八石丁未也黑迷失乞與高興等同征爪哇帝曰也黑迷失惟熟海道海中事當付之其兵事則委之
史彌可也以史彌爲福建等處行中省平章政事統領出征軍馬庚戌高苑縣高希允以非所宜言伏誅
壬子詔塔剌赤程鵬飛討黃聖許劉國傑駐馬軍戍守戊午福建行省叅政魏天祐獻計發民一萬鑿山
鍊銀歲得萬五千兩天祐賦民鈔市銀輸官而私其一百七十錠臺臣請追其贓而罷鍊銀事從之改燕
南河北廉訪司遷治真定高麗女直界首雙城告饑救高麗王於海運內以粟賑之弛平瀾州酒禁詔不
敦忙兀魯迷失以軍征八百媳婦國九月己未朔治書侍御史裴居安言月的迷失遇盜起不卽加兵盜
去乃延誅平民詔臺院遣官按問之辛酉詔諭安南國陳日煥使親入朝選湖南道宣慰副使梁曾授吏
部尙書佩三珠虎符翰林國史院編修官陳孚授禮部郎中佩金符同使安南山東東西道廉訪司劾宣
慰使樂寶盜庫鈔百二十錠寶庫銀九百五十兩官局私造弓勒等物受屯田鈔百八十錠樂寶宜解職
從之丁卯中書省臣言茹竊十圍安化等新附洞蠻凡八萬宜設管軍民司以其土人蒙意蒙世莫仲文
爲長官以呂天佑塔不帶爲達魯花赤八番韓羅思招附光蘭州洞蠻宜置定遠府就用其所舉禿于高
守文黃世曾燕只哥爲達魯花赤知府同知判官制曰可癸酉徙沔州治鐸水縣廢新得州置通江縣復

漢州綿竹縣沙州瓜州民徙甘肅兩界盡地使耕無力者則給以牛具農器蠶夏戶口繁多而
土田半栽紅花詔令盡種穀麥以補民食丁丑以平瀨路大水且霜免田租二萬四千四十一石辛巳太
白犯南斗罷雲南行臺徙置西川設雲南廉訪司壬午水達達女直民戶由反地驅出者押回本地分置
萬夫千夫百夫內屯田甲甲烏思藏宣慰司言由必里公反後站驛遂絕民貧無可供億命給烏思藏五
驛各馬百牛二百羊五百皆以銀軍七百三十六戶戶銀百五十五丁亥從宣政院言置烏思藏納里速
古兒孫等三路宣慰使司都元帥冬十月戊子朔詔福建廉訪司知事張師道赴闕師道至乞汰內外官
府之冗濫者詔麥朮丁何榮祖馬紀燕公楠等與師道同區別之數月授師道翰林直學士日本舟至四
明求互市舟中甲仗皆具恐有異圖詔立都元帥府令哈刺帶將之以防海道詔浚浙西河道導水入海
庚寅兩淮運使納速刺丁坐受商賈賄多給之鹽事覺詔嚴加鞠問癸巳弛上都酒禁燕公楠言歲終各
行省臣赴闕奏事亦宜令行臺臣赴闕奏一歲舉刺之數制曰可丙申四川行省以洞蠻酋長向思聰等
七人入朝壬寅從朱清張瑄請授高德誠管領海船萬戶佩雙珠虎符復以殷寶陶大明副之令將出征
水手甲辰信合納帖音國遣使入覲廣東道宣慰司遣人以暹國主所上金冊詣京師乙巳太陰犯井丁
未太陰犯鬼己酉樞密院臣言六衛內領漢軍萬戶見存者六千戶撥分爲二力足以備車馬者二千五

百戶每甲令備馬十五匹牛車二輛力足以備車者五百戶每甲令備牛車三輛其三千戶惟習戰鬪不他役之六千戶外則供他役庶能各勤乃事而兵亦精銳詔施行之詔擇囚徒罪輕者釋之癸丑完澤等言凡賜諸人物有二十萬錠者爲數既多先賜者盡得之及後將賜或無可給不均爲甚今計怯薛帶怯憐口昔博赤哈喇赤凡近侍人上等以二百戶爲率次等半之下等又半之於下等擇尤貧者歲加賞賜則無不均之失矣一歲天下所入凡二百九十七萬八千三百五錠今歲已辦者纔一百八十九萬三千九百九十三錠其中有未至京師而在道者有就給軍旅及織造物料館傳俸祿者自春至今凡出三百六十三萬八千五百四十三錠出數已逾入數六十六萬二百三十八錠矣懷孟竹課歲辦千九十三錠尙書省分賦於民人實苦之宜停其稅帝皆嘉納其言命趙德澤吳榮領逃奴無主者二百四十戶淘銀耕田於廣寧藩州乙卯太陰犯氐十一月庚申岳州華容縣水發米二千一百二十五石賑饑民壬戌太陰犯壘壁陣戊寅樞密院奏一衛萬人嘗調二千屯田木八刺沙上都屯田二年有成擬增軍千人從之己卯太陰犯太微東垣上相癸未禁所在私渡命關津譏察姦宄丙戌提省溪錦州銅人等洞酋長楊秀朝等大人入見進方物十二月庚寅中書省臣言皇孫晉王甘麻刺昔鎮雲南給梁王印今進封晉王請給晉王印北安王府尉也里古帶司馬荒兀並爲晉王中尉仍命不只答魯帶狄琮並爲司馬金齒適當

忙兀兒迷失出征軍馬之衝資其芻糧立爲木來府敕應昌府給乞答帶糧五百石以賑饑民癸巳中書省臣言寧國路民六百戶鑿山治銀歲額二千四百兩皆市銀以輸官未嘗採之山乞罷之制曰可庚子太陰犯井甲辰太陰犯太微西垣己酉故麓川路軍民總管達魯花赤阿散男布八同趙昇等招木忽魯甸金齒土官忽魯馬男阿魯來入見貢方物阿魯言其地東南隣境未附者約二十萬民慕化願附請頒詔旨命布八趙昇諭之從之壬子敕中書省用烏思藏站例給合里忽必二站馬牛羊凡爲銀九千五百兩丁巳錠都水監修治保定府沙塘河堤堰是歲賜皇子皇孫諸王藩戚禁衛邊庭將士等鈔四十六萬六千七百十三錠給軍士畸零口糧五千五百二十三石賑其乏者爲鈔三十六萬八千四百二十八錠命國師諸僧呪師修佛事七十二會斷死獄七十四

三十年春正月壬戌詔遣使招諭漆頭金齒蠻乙丑敕福建毋進鶻戊戌和林漢軍四百留百人餘令耕屯航海丙寅太陰犯畢命中書汰冗員凡省內外官府二百五十五所總六百六十九員丁卯安西王請仍舊設常侍不允罷雲南延慶司以洛波卜兒二蠻酋遙授知州各賜璽書戊辰樞密院臣奏兀渾察部兀末魯罕軍每歲運米六千四百二十六石以給之計傭直爲鈔萬二千八百五十二錠詔邊境無事令本軍屯耕以食庚午驗洞會長楊總國等來朝捏怯烈女直二百人以漁自給有旨與其漁於水曷若力

田其給牛價農具使之耕甲戌河南江北行省平章伯顏言揚州忙兀臺所立屯田爲田四萬餘頃官種外宜聽民耕墾揚州鹽轉運一司設三重官府宜削去鹽司止留管勾襄陽舊食京兆鹽以水陸難易計之莫若改食揚州鹽蔡州去汴梁地遠宜陞散府以穎息信陽光州隸之詔皆從其議陞廣州爲上路總管府罷納速刺丁減里所立魚鹽局割江西興國路隸湖廣行省乙亥諡皇太子曰明孝丙子西番一甸蠻酋三人來覲各授以蠻夷軍民官仍以招諭人張道明爲達魯花赤丁丑太陰犯氏戊寅詔舊隸乃顏勝納答兒女直戶四百虛糜廩食令屯田揚州庚辰歲星犯左執法立豪懿州七驛辛巳置遼陽路慶雲至合里賓二十八驛驛給牛三十頭車七輛壬午淮西道宣慰使昂吉兒斂軍鈔六百錠銀四百五十兩馬二匹敕省臺及扎魯火赤鞫問丁亥遣使代祀嶽瀆東海及后土二月己丑從阿老瓦丁燕公楠之請以楊璉真加子宣政院使暗普爲江浙行省左丞詔上都管倉庫者無資品俸秩故爲盜詐宜於六品七品內委用以俸給之高麗國王王晞請易名曰昀其策議府請陞簽議司降二品印從之減河南江浙海運米四十萬石中書省添設檢校二員免大都今歲公賦益上都屯田軍千人給農具牛價鈔五千錠以木八刺沙董之詔以只速滅里與鬼蠻之民隸詹事院壬辰太陰犯畢丙申却江淮行樞密院官不憐吉帶進鷹仍敕自今禁戢軍官無從禽擾民違者論罪丁酉回回字可馬合謀沙等獻大珠邀價鈔數萬錠

帝曰珠何爲當留是錢以贖貧者敕海運米十萬石給遼陽戍兵仍諭其省官薛闢千令伯鑑木部欽察等耕漁自養糧不須給甲辰中書省臣言侍臣傳旨予官者先後七十人臣今欲加汰擇不可用者不敢奉詔帝曰率非朕言凡來奏者朕祇令諭卿等可用與否卿等自處之又言今歲給餉上都大都及甘州西京經費浩繁自今賞賜悉宜姑止從之乙巳熒惑犯天街丁未車駕幸上都以新附洞蠻吳勳繫爲潭溪等處軍民官佩金符給新附軍三百人人鈔十錠屯田真定庚戌太陰犯牛辛亥詔發總帥汪惟和所部軍三千征土番又發陝西四川兵萬人以行樞密官明安答兒統之征西番敕以韶贛相去地遠分贛州行院官一員鎮韶州復立雲南行御史臺詔沿海置水驛自耽羅至鴨綠江口凡十一所令洪君祥董之癸丑太白犯壘壁陣江西行院官月的迷失言江南豪右多庇匿盜賊宜誅爲首者餘徙內縣從之申嚴江南兵器之禁三月庚申以同知樞密院事扎散知樞密院事以平章政事范文虎董疏漕河之役平章政事李庭率諸軍扈從上都雨壞都城詔發侍衛軍三萬人完之仍命中書省給其傭直甲子括天下馬十萬匹己巳立行大司農司洪澤芍陂屯田舊委四處萬戶詔存其二立民屯二十辛亥太陰犯氐夏四月己亥行大司農燕公楠翰林學士承旨留夢炎言杭州上海澈浦温州慶元廣東泉州置市舶司凡七所唯泉州物貨三十取一餘皆十五抽一乞以泉州爲定制從之仍併温州舶司入慶元杭州舶司入

稅務江南行大司農司自平江徙揚州兼管兩淮農事省八番重設州縣官罷徽州錄事司皇孫晉王位立內史府詔諸二品官府自今與各部文移相關鞏昌二十四城依舊例於總帥汪氏弟兄子姪內選用二人壬寅樞密院臣言去年征爪哇軍二萬各給鈔二錠其後祇以五千人往宜徵元給鈔三萬錠入官帝曰非其人行乃朕中止之耳勿徵癸丑太白犯填星廣東肅政廉訪司復治廣州甲寅詔遣使招諭暹國幹羅思請以八番見戶合思播之民兼管徙宣慰司治辰沅靖州常賦外歲輸鈔三千錠不允光州蠻人光龍等一十二人及邦崖王文顯等二十八人金竹府馬麟等一十六人大龍番禿盧忽等五十四人永順路彭世彊等九十人安化州吳再榮等一十三人師壁散毛洞勾答什王等四人各授蠻夷官賜以璽書遣歸敕江南毀諸道觀聖祖天尊祠五月丙辰朔給四部更番衛士馬萬匹又給其必闊赤四百匹壬戌定雲洞蠻酋長來附癸亥括思播等處亡宋涅手軍丙寅詔委官與行省官閱覈蠻夷軍民官以江南民怨楊璉真加罷其子江浙行省左丞暗普詔以浙西大水冒田爲災令富家募佃人疏決水道辛未敕僧寺之邸店商賈會止其物貨依例收稅丁丑中書省臣言上都工匠二千九百九十九戶歲糜官糧萬五千二百餘石宜擇其不切於用者俾就食大都從之甲申眞定路深州靜安縣大水民饑發義倉糧二千五百七十四石賑之六月丙戌敕選河西質子軍精銳者八百給以鎧仗鞍勒狐貉衣裘遣赴皇